

1850, igl 1. d'avrel

Conclusiun dalla cumissiun da scola.

1. Ei concludiu da metter pils cudischs duvrai, cudischs instructivs 6 bluzchers. Cudischs screts 3 bluzchers. Cudischs pigns da leger 2 bluzchers, ils cudischs dueien restar vid la scola, vul dir per onn.
2. Dueigi la scola cheu a **Sedrun** e **Cavorgia** vegnir cuntinuada aunc 15 dis, nunsavend luvrar eis ei reservau da schar far vinavon aunc ina jamna ei dueigi vegnir teniu in examen pils da Sedrun sin ils 13 dil present e pils da **Rueras** sin ils 6 dil present.
3. Ei concludiu da puspei turnar a muentar sin vischnaunca ariguard il far pagar ils affons ch'han frequentau la scola igl unviern, sco era per quels che frequentan cheu la stad sco era davart il segirar la casa da scola.
4. Nunimpediments duei la scola dalla stad vegnida entschevida ils 13 da matg.

1850, ils 12 da matg

1. Ei concludiu da schar frequentar la scola dalla stad fargliuns in per l'auter, temps per temps, vul dir in per l'auter, senza stuer pagar pli che la taxa da 2 fl. Buc aber in che ha entschiet a frequentar e cala lura si e metta buca in auter, quel ei obligaus da pagar ils 2 fl.
2. Ha la cumissiun acceptau il plan dil signur scolast, il qual ei s'obligaus da far duas gadas scola a **Sedrun**, ed ina enta **Rueras**, bein aber ch'ei vegni dau ad el ina raschuneivla indemnisaziun, la quala el remetta alla cumissiun da scola presenta. La cumissiun ha lura schau sura da organiser en il temps ed uras al signur scolast ed al segnerfarrer cun, sch'ei fa da basegns, aunc in auter commember dalla cumissiun. Otg uras scola en tut per di.
3. Davart la lenna ei concludiu che mintgin dueigi stuer trer ina vaulta lenna per affon e schar urentar quella in commember dalla cumissiun da scola, il qual dueigi leutier esser destinaus. Quels che tilan buca la lenna ein obligai da pagar 50 xr per scadina vaulta. La lenna dueigi esser tratga mintgamai cura che la scola digl unviern cala si. La restonza dalla lenna ch'ei stada anavos gl'onn 1850 dueigi sin Nadal 1850 esser tratga, a quella caschun ein quels era obligai da pagar ils 50 x per vaulta, quella regla dueigi survir per **Sedrun** e **Rueras**, insumma per tuttas scolas.

1850, ils 27 d'october

Ein stai presents: segnerfarrer, sur Deplaz, sur Beer, assistent Schmed, stalter Paul Wenzin, Giachen Fidel Caveng, stalter Gion Andriu Berther, Hans Giachen Beer, scarvon Monn, Lucas Caveng e Stiaffen Schmed.

1. Ei vegniu dil signur president mess en enconuschientscha ch'ei seigi da basegns da procurar per in schulmeister a **Rueras** pigl unviern. Concludiu d'essend presents, dumandar sur Beer sch'el vegli surprendre da far scola per quest unviern. Il qual dat giu la declaronza, allegond pliras raschuns, ch'el sappi per quest unviern buca surprendre. Sin quella declaronza vegn sur Beer dalla cumissiun da scola unanimamein supplicaus da surprendre da far la scola cun aunc dasperas seporscher da dar en cass da basegns in agid. Sin quei resalva signur sur Beer in per dis da patertgar – sin quei refretg per oz.
2. Damonda cura far entscheiver las scolas.
 - a) La scola da **Sedrun**: entschatta ils 5 da november e finir la primavera tenor sco il temps damonda. Aschia ha la cumissiun resalvau dad allura fixar cura schar calar si il cuors digl unviern.
 - b) Era a **Rueras** concludiu il medem.
 - c) **Selva** tenor usit.
 - d) Concludiu ariguard la scola da **Cavorgia**. Entras signur farrer e Lucas Caveng schar dumandar els cons affons ch'ei tarmettien a scola, sch'ei hagien enzatzgi che fetschi scola e per con quel fetschi la

scola e con ils vischins veglien sacrificar ord lur sac, suenter ni entochen che quellas rispostas ein buca anavos prender neginas positivas conclusiuns.

3. Damonda ariguard l'indemnisaziun al "schulmeister" per la stad per haver fatg duas uras daplì scola, per ira a **Rueras** e far la scola. Concluiu da dar, essend stau remess alla cumissiun da scola, per quella breigia ultra sia obligaziun 20 fl.

4. Damonda tgei dar a quels treis signurs, statalter Gion Andriu Berther, Hans Giachen Beer, Paul Schmed ch'ei stai a stagià ora las pastiras, ein stai dus dis e concluiu da dar 1 fl. per di e prender giu enzatgei spesas a **Selva** tier sur Deplaz. Ei era concluiu da dacheudenvi dueigi negin dar ni pagar daplì per di ch'in flurin per um che sto far breigias per la scola.

1850, ils 27 da november

Concediu dalla cumissiun per far la scola al signur G. B. Beer 65 fl. e da pagar sin primavera e per il local da far la scola per **Rueras** 3 fl. 20 x.

Quels che han da trer en per il fein a pastg e per ils affons che han frequentau la scola:

per **Sedrun**: Stiafen Monn
Rueras: statalter Paul Wenzin
Selva e Tschamut: Stiafen Schmedt
Surrein: statalter Leci Mucli
Cavorgia: Gion Antoni Schmedt
Camischolas: Gion Battista Berther

Sto esser tratg en sin s. Andriu.

Davart ils da **Cavorgia** ei concluiu da dar 25 fl. cun cundiziun ch'els mirien sez per in schulmeister che fetschi ina buna scola, sco era da purtar sin vischnaunca ch'ei vegni ... schau tier da prender si sin pastira da casa zatgei vadias, els ein aber era culpons da pagar alla cassa da scola quei ton per affon sco igl ei dalla cumissiun da scola mess si.

La cumissiun ha elegiu ora per cassier da scola il Tumaisch Schmedt da **Camischolas**.

1851, ils 11 d'avrel

Ha la cumissiun da scola fixau da tener ils examens da scola per **Rueras**, gliendisdis dalla jamna sontga, ils 14 da quest, per **Sedrun** ils 15 e per **Cavorgia** ils 16 e dad entscheiver allas 10 uras avonmiezdi. Il cuors da scola digl unviern duei aunc cuzzar entochen la fin digl avrel, num che las lavurs dil funs vegnessien avon da far, en il qual cass lura la scola calar si. Era sur Gion Bistgaun ei tier quei s'obligaus, resalvond per la jamna sontga. La vacanza dalla primavera dueigi cuzzar per in meins.

Daplì eis ei vegniu sbassau la taxa digl affon per la scola dalla stad cun far pagar quel mo 30 x enstagl ils 2 fl.

Davart il tener scola la stad a **Rueras** eis ei ad interim concluiu da schar vegnir ensemen ils vischins da leu per mirar tgei affons che vegnessien tier quella.

1851, ils 9 da zercladur

Ha la cumissiun concluiu da schar accordar il mir dalla casa da **Rueras**. Dau cumissiun als cumissiunai da prender en "augenschein" ensemblamein cun ils miradurs Steger e soziai.

2. Davart la casa da scola da **Selva** ei sentelgiu da baghegiar en **Sut Crestas** ina casa tenor plan, numnadamein dueigi suten, sco en tschaler ina baselgia da maniera ch'ils divins uffecis temps d'unviern sappien vegnir fatgs. Nua tschentar la casa ha la cumissiun incumpensau signur farrer, signur Lucas Caveing, Giachen Martin Berther e Thomas Schmedt. Las lennas dueigien vegnir duladas, messas a guvern sut tetg, ed el medem temps mirar da saver marcaradur cun zatgi che surpren da baghegiar si quei da lenn.

3. Davart il moni fier da Gion Alexi ei concludiu da vegnir ni secunvegnir cun el tenor sco gest ei.
4. Ei serrau giu in accord cun Vigilius Beer e Lezi Mucli da pinar ora la casa da scola da **Rueras**, sco muossa igl accord.

1851, ils 21 da settember

1. Ha la cumissiun da scola, damai che las voluntarias unfrendas dils da **Selva** ein en parts schon dadas en, concludiu da baghegiar la casa da scola, pervenda e baselgia tenor plan e da schar marcarad vi en cuort entras il numnau beschluss, cun igl exprimiu giavisch che quella sesprovi da risguardar ton sco pusseivel ils fleivels interess dalla scola, bein adina senza donn dil baghetg.
2. Eis ei vegniu cumissiunau quei, cun aunc ver tratg tier e supplicau il signur caplon Gion Bistgaun ed in dils signurs geraus u signur assistent Schmed ni signur Hans Giachen Beer, da tschentar si ils necessaris instruments per collectar ton egl jester sco el cantun per basegns da quei edifeci e da quels lura anora far ils necessaris pass e tarmetter ora.
3. Ha la cumissiun sin declaronza da signur caplon, che el muort circumstanzias da sanadad, sappi e possi buca far la scola da **Rueras**, danovamein exprimiu siu desideri e cuntentientscha ch'el duessi far la scola vinavon, aber sin sia repatida declaronza decretau da dar part quei al vischinadi da **Rueras** e metter quel ella vera enconuschientscha e sentir da quel siu giavisch sur da quels fatgs che quel dueigi enteifer e sil pli ditg da 15 dis dar giu siu meini sur da quels.
4. Eis ei concludiu da schar finir damaun la scola dalla stad e lura da prender tier quei muncament da 12 dis ch'il scolast Biscuolm havess aunc da far per il cuors da stad, tier il futur cuors digl unviern, cun schar entscheiver per quei pli baul.

1851, ils 25 d'october

1. Ha la cumissiun da scola, sin quei di seradunada danovamein, instanziau il segner signur caplon Gion Bistgaun da vuler surprender la scola da **Rueras**, il qual lura ha finalmein seschau perschuer ad interim, cun la resalva che sche sia sanadad total lubeschi buca, che la cumissiun libereschi el era duront il cuors scolastic e miri per in auter, la quala resalva era la cumissiun ha acceptau e lura dau ad el il salari da 80 fl. per il cuors digl unviern. Il scaldar la pegna ed il scuar la stiva da scola dueien ils da **Rueras** surprender.
2. Ha la cumissiun ordinau d'entscheiver la scola ils 27 da uost onn current.
3. Als da **Cavorgia** fixau da dar il sustegn per il scolast sco igl onn vargau.

1855, 28 d'october

Ei seradunada la cumissiun da scola ed ein cumpari ils sequents signurs, numnadamein:

segnerfarrer, president

statalter Gion Andriu Berther

statalter Gion Rest Monn

Giachen Antoni Schmett

Stiaffen Schmett

Sep Antoni Deragisch

La raschun, la quala la cumissiun da scola ei stada radunada, ei per contractar cun ils "schulmeisters". Sche essan nus unitamein vegni perina e contractau da far la scola da **Sedrun** per igl onn 1855 entochen 1856 che va ora cun la lavur sin il feld e da leu naven dueigi vegnir fatg la scola da firaus e dumengias entochen igl εμπrem da november digl onn 1856, sco era dueigi el esser obligaus da scaldar la pegna, sco era far ora la lenna e resgiar ella, sche gl'ei affons che san gidar a resgiar e far ora, sco era sunar las orglas; cun il schulmeister Johann Anton Soliva, sche per far la scola da **Sedrun** cun las suras cundiziuns e per siu salari eis ei dau ad el per in onn 250 frs.,

sco era dueigi el esser obligaus da dar igl exercezi dil cantus dalla baselgia.

En num dalla cumissiun scolara:

Joseph Anton Durgiai, president

Scolast Johann Anton Soliva

1855, ils 28 d'october

Eis ei serrau giu da far la scola da **Cavorgia** igl onn 1855 entochen anno 1856 entochen che va ora a luvrar sin il feld, cun Leci Antoni Balzart e per salari eis ei dau ad el 68 frs.

Per "fede" da quei

En num dalla cumissiun scolara

Joseph Antoni Durgiai, president

Lezi Ant. Balzart

1855, ils 2 da november

Ei serrau giu tenor entelgientscha fatga ils 28 d'october cun il scolast Michel Simonet per far la scola da **Rueras** per igl onn da scola 1855 e 1856 entochen che las lavurs dalla primavera entscheivan ed igl ei dau ad el per salari 125 frs. cun dasperas la lenna per cuschinar per el quei temps ch'el stat leuen. Lura eis ei era concediu ad el treis dis liber per basegns dad ira cun ils s.h. tiers a **Disla** e lura turnar cheu en **Tujetsch**, sco era turnar engiu cun els.

En fede da quei

Joseph Anton Durgiai en num dalla cumissiun scolara

Michel Antoni Simonet

1859, ils 23 d'avrel

Ei la cumissiun da scola stada seradunada e zuar en persuna dils sequents:

signur professor Condrau sco inspectur da scola

signur assistent Gion Antoni Schmet da **Gonda**

statalter Gion Rest Monn

statalter Gion Andriu Berther

statalter Sep antoni Muggli da **Cavorgia**

statalter Sep Antoni Muggli da **Sedrun**

Giachen Fidel Cavegn

Sep Antoni Deragisch

ed jeu Joseph Anton Durgiai, farrer.

1859, ils 2 da zercladur

Ha la ludeivla vischnaunca legiu ora la sequenta cumissiun da scola:

president Joseph Antoni Durgiai, farrer

Commembers:

statalter Gion Andriu Berther, giuven

Stiaffen Monn

Giachen Fidel Cavegn

statalter Gion Antoni Peder da **Selva**

statalter Sep Antoni Muggli da **Cavorgia**

E lura duei ei era esser tier las solitas radunonzas silmeins in dils signurs geraus en uffeci.

1859, ils 22 d'october

Ei la cumissiun da scola stada seradunada en las personas da signur gerau Duri Wenzin, stalter Gion Andriu Berther, Giachen Fidel Cavegn e segnerfarrer Durgiai e priu las sequentas conclusiuns. Als da **Camischolas** eis ei concediu per temps da dus onns, sche la vischnaunca ei da quei cuntenza, in scolast, sut la cundiziun che lur scola seigi sutamessa alla cumissiun da scola, sco las outras scolas da vischnaunca. Quels dus onns fussen 1859/60 – 1860/61. Co aber pagar ils scolasts, duei vegnir rapportau sin vischnaunca, schebein quei solet cun ils auters, duei vegnir selarisaus en massa, ni sunter affons. Per ils scolast ei surschau al segnerfarrer per s'entelgir cun il scolast Mihael Maissen da **Cuoz** a **Mustér**.

Plinavon eis ei concludiu da prender en tuttas scolas ils medems cudischs da scola, sco quei che nus havein giu entochen dacheu, numnadamein

1. classa Cudisch da A.B.C
2. classa II cudisch da leger ed Uffeci
3. La Bibla, Cudisch instructiv da signur Plazi ed Uffeci

Finalmein dueien las scolas entscheiver, sche pusseivel ei, ils 3 da november en la persona dils scolasts:

Caderas da **Ladir** per **Sedrun** cun loschi e salari da 210 frs.

Wagieli Riedi da **Mustér**, **Mumpe Medel**, per **Rueras** cun loschi e salari 180 frs.

Monn da **Cumpadials**, **Selva**, cun loschi e salari 150 frs.

Steiner da **Cumpadials** per **Cavorgia** cun loschi e salari 100 frs.

Tumaisch Giacumet da **Sedrun** per ils pigns cun salari 51 frs.

Maissen da **Cuoz**, scolast a **Camischolas** 140 frs.